

## REGLUGERÐ

### um breytingu á reglugerð um gerð lyfseðla og afgreiðslu lyfja nr. 291/1979.

#### 1. gr.

Við 6. gr., b staflið bætist nýr töluliður:

„XVI. Bromazepamum. Hámarks magn á lyfseðli 300 mg (Dæmi: Lexotan 1,5 mg 200 töflur, 3 mg 100 töflur, 6 mg 50 töflur).“

#### 2. gr.

Eftirfarandi viðbót verður við viðauka 1 við reglugerðina (undanþágur varðandi lausasölu nokkurra lyfja, skv. 13. gr. a).

Lyf eða lyfja-samsetningar	Samsetningar, er selja má í lausasölu	Athugasemdir	Dæmi
Oxymetazolinum INN, klóríð	Lyf í afmældum skömmtum, mest 20 skammta	Einstakur skammtur mest 45 míkgróg Áletrun: Samkvæmt ákvörðun ráðuneytisins við skráningu	NEZERIL, nefdropar 0,1 mg/ml, 0,25 mg/ml eða 0,5 mg/ml

#### 3. gr.

Reglugerð þessi, sem sett er samkvæmt heimild í 16. gr. lyfjalaga nr. 108/1984, tekur gildi 1. janúar 1987.

*Heilbrigðis- og tryggingamálaráðuneytið, 17. október 1986.*

**Ragnhildur Helgadóttir.**

*Páll Sigurðsson.*

## REGLUGERÐ

### um fullvirðisrétt til framleiðslu sauðfjárafurða verðlagsárið 1987—1988.

#### I. KAFLI

#### Orðaskýringar.

#### 1. gr.

Merking orða í reglugerð þessari er sem hér segir:

**Framleiðandi** er hver sá, sem á eigin vegum hefur með höndum búvöruframleiðslu til afhendingar í afurðastöð, hvort sem er einstaklingur, lögaðili, aðili að félagsbúi eða ríkisbúi.

**Búmark** er viðmiðunartala afurðaeininga reiknuð í ærgildum, sem ákveðin er fyrir lögbýli eða framleiðendur búvöru utan lögbýla skv. reglugerð nr. 339/1986.

**Ærgildisafurð** er afurðaeining. Ein ærgildisafurð telst vera 18,2 kg af kindakjöti (16,8 kg af dillakjöti og 33,0 kg kjöts af fullorðnu fé) og tilsvarandi magn af slátri og gærum.

**Lögbýli** eða jörð er í reglugerð þessari skilgreint skv. 1. gr. ábúðarlaga nr. 64, 31. maí 1976 með síðari breytingum.

**Félagsbú** er sameiginlegur búrekstur tveggja eða fleiri einstaklinga á einu eða fleiri lögbýlum með samningi, sem hlotið hefur samþykki landbúnaðarráðuneytisins, sbr. jarðalög nr. 65/1976 með síðari breytingum.

**Fullvirðisréttur** er það magn sauðfjárafurða, sem búmarkssvæði og/eða framleiðendum er ábyrgt fullt verð fyrir á grundvelli samnings skv. a-lið 30. gr. 1. nr. 46/1985.

## II. KAFLI

### Um fullvirðisrétt til framleiðslu sauðfjárafurða.

#### 2. gr.

Ákvæði þessarar reglugerðar taka til framleiðslu sauðfjárafurða verðlagsárið 1987—1988, þ. e. tímabilið 1. september 1987 til og með 31. ágúst 1988. Á því tímabili skulu framleiðendur sauðfjárafurða fá greitt grundvallarverð fyrir 11 800 tonn af kindakjöti með tilsvarendi magni af slátri og gærum, sbr. þó III. kafla, eins og verðið er ákveðið af verðlagsnefnd búvara á hverju verðtímabili. Miðað er við innvegnar sauðfjárafurðir til afurðastöðvar, sem skipt er á milli framleiðenda sauðfjárafurða eftir ákvæðum þessarar reglugerðar.

#### 3. gr.

Framleiðsluráð landbúnaðarins annast útreikning fullvirðisréttar samkvæmt reglugerð þessari, sbr. þó 9. gr., og heldur skrá um hann.

#### 4. gr.

Búmarkssvæði skulu vera hin sömu og ákveðin voru með reglugerð nr. 339/1986.

Fullvirðisréttur búmarkssvæðis til framleiðslu sauðfjárafurða ( $FR_{k_{sv}}$ ) fyrir verðlagsárið 1987—1988 skal fundinn með eftirfarandi reiknireglu:

$$FR_{k_{sv}} = \frac{SM \times GT_{k_{sv}}}{SGT_k}$$

þar sem

$SM$  er heildarfullvirðisréttur til framleiðslu kindakjöts sbr. 2. gr.

$GT_{k_{sv}}$  er grunntala búmarkssvæðis. Grunntala er innvegið kindakjöt allra framleiðenda innan búmarks á búmarkssvæðinu það verðlagsáranna 1984—1985 eða 1985—1986 sem kjötmagnið er meira. Við innvegið kindakjöt skal bæta staðfestri liflambasölu á búmarkssvæðinu vegna fjárskipta að opinberum fyrirætlum, eftir að hún hefur verið umreiknuð til kjötinnleggs, enda fari summan ekki fram úr hlutaðeigandi búmarki. Skal kjötinnleggið metið sem lifandi þungi seldra lamba x 0,4.

$SGT_k$  er samanlagðar grunntölur allra búmarkssvæða landsins.

#### 5. gr.

Nú nýtir búmarkssvæði ekki fullvirðisrétt sinn á verðlagsárinu 1987—1988 og skal Framleiðsluráð landbúnaðarins ráðstafa mismuninum þannig:

- heimilt er að ráðstafa allt að þriðjungi mismunarins til búmarkssvæða, þar sem nauðsynlegt hefur reynst að endurnýja sauðfjárstofn vegna sauðfjárjúkdóma á árunum 1982—1986, að báðum árum meðtöldum.
- heimilt er að halda eftir allt að 1000 ærgildisafurðum til leiðréttinga sem nauðsynlegar kunna að reynast skv. 16. gr.
- því sem eftir stendur skal ráðstafað til annarra búmarkssvæða þannig að skerðing framleiðslu hjá einstökum framleiðendum verðlagsárið 1987—1988 verði sem jöfnust að tiltölu miðað við framleiðslu þeirra af sauðfjárafurðum það verðlagsáranna 1984/1985 og 1985/1986, er hún var meiri.

## 6. gr.

Til þess að framleiðanda sé reiknaður fullvirðisréttur til framleiðslu sauðfjárafurða á verðlagsárinu 1987—1988 þarf hann að fullnægja eftirtöldum skilyrðum:

- a) hafa búmark í sauðfjárrækt skv. reglugerð nr. 339/1986.
- b) hafa lagt sauðfjárafurðir inn í afurðastöð á verðlagsárinu 1985/1986. Framleiðsluráði landbúnaðarins er heimilt að víkja frá þessu ákvæði hafi framleiðsla verið felld niður tímabundið, eða vegna niðurskurðar sauðfjár vegna sjúkdóma.

## 7. gr.

Fullvirðisréttur hvers framleiðanda sauðfjárafurða á verðlagsárinu 1987/1988 skal fundinn þannig:

1. Framleiðendum í þéttbýli sem hafa búmark í sauðfé skal reiknaður fullvirðisréttur allt að 80% af innleggi þeirra verðlagsárið 1985/1986, þó að hámarki 60% af búmarki þeirra.
2. Þar sem sauðfé hefur verið fellt vegna útrýmingar sauðfjársjúkdóma að opinberum fyrirætlum, er Framleiðsluráði landbúnaðarins heimilt:
  - a) að reikna framleiðendum, er líflömb tóku haustið 1985, fullvirðisrétt sem nemur 1,0 ærgildisafurð fyrir hverja á og 0,8 ærgildisafurðum fyrir hvert lamb sem þeir setja á haustið 1986. Hlutaðeigandi búnaðarsamband skal veita Framleiðsluráði staðfestar upplýsingar um fjölda ásettra kinda.
  - b) að reikna framleiðendum, er líflömb taka haustið 1986, fullvirðisrétt sem nemur 0,8 ærgildisafurðum fyrir hvert keypt lamb. Sauðfjársjúkdómanefnd skal veita Framleiðsluráði staðfestar upplýsingar um fjölda keyptrra lamba.

Fullvirðisréttur skv. þessum tölulíð skal aldrei vera meiri en nemur búmarki hlutaðeigandi lögbýlis.

3. Þá skal engum framleiðanda sauðfjárafurða ætlaður meiri fullvirðisréttur en nemur innleggi hans innan búmarks það verðlagsáranna 1984/1985 og 1985/1986, er innleggið var meira, sbr. þó 9. gr. Til innleggs skal einnig reikna staðfesta líflambasölu framleiðanda, sbr. 4. gr. Framangreinda hámarkstölu er Framleiðsluráði landbúnaðarins heimilt að lækka, hafi framtöldum sauðkindum hlutaðeigandi framleiðanda skv. forðagæsluskýrslu fækkað um meira en 20% frá hausti 1983 til hausts 1985, enda hafi þær verið fleiri en 100 haustið 1983. Skal þá lækka hámarkstölnuna um eina ærgildisafurð fyrir hverja sauðkind, sem um hefur verið fækkað umfram áður nefnd 20%.
4. Þurfi að grípa til frekari skerðingar á einstökum búmarkssvæðum, þannig að samantlagður fullvirðisréttur framleiðenda á svæðinu verði jafn fullvirðisrétti hlutaðeigandi svæðis, skal skerða fullvirðisrétt framleiðenda frá búmarki þannig að innlegg sem svarar til:

95,1—100 %	af sauðfjárbúmarki	skerðist að hámarki um	10%
85,1—95 %	af sauðfjárbúmarki	skerðist að hámarki um	7%
75,1—85 %	af sauðfjárbúmarki	skerðist að hámarki um	5%
70,1—75 %	af sauðfjárbúmarki	skerðist að hámarki um	3%
65,1—70 %	af sauðfjárbúmarki	skerðist að hámarki um	1%

## 8. gr.

Fullvirðisréttur, eins og hann er reiknaður skv. 7. gr., skal margfaldaður með 0,97. Fæst þá **lágmarks fullvirðisréttur** framleiðanda til framleiðslu sauðfjárafurða verðlagsárið 1987—1988. Skal Framleiðsluráð landbúnaðarins tilkynna hverjum einstökum framleiðanda þá tölu fyrir 10. nóvember 1986.

## 9. gr.

Fullvirðisrétti sem ekki er ráðstafað skv. 8. gr. er viðkomandi búnaðarsambandi heimilt að ráðstafa til framleiðenda sem um það sækja og uppfylla einhver eftirtalinn skilyrða:

1. Framleiðendur, sem framleiddu minna en 300 ærgildisafurðir mjólkur og sauðfjárafurða verðlagsárið 1985/1986 og höfðu meirihluta tekna sinna af mjólkurframleiðslu og sauðfjárrækt skv. síðasta skattframtali.
2. Framleiðendur sem orðið hafa fyrir einstaklingsbundnum áföllum í sauðfjárrækt, svo sem vegna sauðfjársjúkdóma og annarra orsaka, þannig að innlegg þeirra á verðlagsárunum 1984/1985 og 1985/1986 eftir ásettan fjárstofn telst vera óeðlilega lítið miðað við afurðir næstu tvö verðlagsár á undan.
3. Framleiðendur, sem tekið hafa í notkun ný fjárhús og/eða hlöður, stækkuð fjárhús eða endurnýjuð að meirihluta eftir 1. september 1983 eða stofnað til félagsbús eftir 1. janúar 1983.
4. Framleiðendur, sem teljast frumbýlingar, þ. e. hafa hafið búskap eftir 1. janúar 1983.

Umsókn um undanþágu, studd staðfestum upplýsingum um búskaparaðstöðu, skal senda viðkomandi búnaðarsambandi fyrir 1. október 1987. Búnaðarsamband tilkynnir umsækjendum og Framleiðsluráði landbúnaðarins afgreiðslu umsókna fyrir 30. nóvember 1987.

Búnaðarsambandi er heimilt að fela Framleiðsluráði landbúnaðarins að annast fyrir sína hönd framangreinda ráðstöfun fullvirðisréttar á grundvelli tillagna, sem sambandið gerir til ráðsins.

## 10. gr.

Nú nýtir framleiðandi ekki fullvirðisrétt sinn með innleggi kindakjöts í afurðastöð fyrir 10. nóvember 1987, með sölu og/eða leigu skv. 13. gr., eða hefur gert staðfest samkomulag við afurðastöð um að nýta hann með innleggi síðar á verðlagsárinu 1987/1988. Er þá hlutaðeigandi búnaðarsambandi heimilt að ráðstafa fullvirðisréttinum skv. ákvæðum 9. gr.

## 11. gr.

Framleiðanda er óheimilt að ráðstafa fullvirðisrétti sínum til annars aðila eða leggja afurðir inn í afurðastöð á fullvirðisrétti annars framleiðanda án samþykkis viðkomandi búnaðarsambands. Samþykki búnaðarsambands skal berast Framleiðsluráði landbúnaðarins fyrir 1. október 1987.

Við ábúendaskipti á lögbýlum skal framleiðsla fráfarandi bónda og þess er við tekur teljast framleiðsla býlisins á viðkomandi verðlagsári. Reiknast hún skv. því búmerki og þeim fullvirðisrétti, sem viðkomandi lögbýli hefur og skiptist á milli þeirra í því hlutfalli sem notað hefur verið, þegar ábúendaskipti fara fram.

## 12. gr.

Framleiðsluráð landbúnaðarins tilkynnir hlutaðeigandi sláturleyfishöfum fullvirðisrétt framleiðenda eigi síðar en 10. desember 1987.

Sauðfjársjúkdómanefnd skal tilkynna Framleiðsluráði eigi síðar en 30. nóvember 1987 um þá framleiðendur, sem selt hafa líflömb á verðlagsárinu 1987—1988 vegna fjárskipta að opinberum fyrirmælum. Skal Framleiðsluráð reikna þunga hinna seldu líflamba til kjötinnleggs skv. reglu 4. gr., og minnka fullvirðisrétt þess framleiðanda er í hlut á, sem því nemur, áður en réttur til sláturfjársölu er tilkynntur skv. 1. mgr. þessarar greinar.

Frumgreiðsla fyrir sauðfjárafurðir skv. 1. tl. 29. gr. 1. nr. 46/1985 skal miðuð við lágmarks fullvirðisrétt hlutaðeigandi framleiðanda skv. 8. gr. Fullnaðargreiðsla og viðbótargreiðsla skv. 2. og 3. tl. 29. gr. áður nefndra laga skulu miðast við fullvirðisrétt framleiðanda til framleiðslu sauðfjárafurða skv. þessum kafla.

## III. KAFLI

## Um sölu og/eða leigu fullvirðisréttar.

13. gr.

Nú óskar framleiðandi eftir að selja og/eða leigja fullvirðisrétt í samræmi við samning landbúnaðarráðherra og Stéttarsamband bænda um magn mjólkur og sauðfjárafurða dagsettan 21. september 1986. Skal framleiðanda þá heimilt að selja og/eða leigja fullvirðisrétt sinn allan eða hluta hans, eins og rétturinn reiknast samkvæmt 8. gr. (lágmarks fullvirðisréttur).

14. gr.

Framleiðsluráð landbúnaðarins breytir skrá um fullvirðisrétt og búmark í samræmi við samninga um skipti, sölu og/eða leigu á fullvirðisrétti sem staðfestir eru á grundvelli samnings, sbr. 11. og 13. gr.

## IV. KAFLI

## Ýmis ákvæði.

15. gr.

Framleiðsluráð landbúnaðarins aflar upplýsinga vegna framkvæmdar þessarar reglugerðar og annast eftirlit með uppgjöri afurðastöðva við framleiðendur. Afurðastöðvum er skylt að láta Framleiðsluráði landbúnaðarins í té allar þær upplýsingar sem að gagni geta komið við störf þess og þær geta veitt.

16. gr.

Framleiðsluráð landbúnaðarins skal tilkynna framleiðendum fullvirðisrétt þeirra. Þeir eiga þess kost að gera athugasemdir við hann og skulu þær berast Framleiðsluráði landbúnaðarins innan 30 daga frá birtingu tilkynningar, ella gildir hann fyrir verðlagsárið. Framleiðsluráð landbúnaðarins endurskoðar útreikninga, sem athugasemdir eru gerðar við og tilkynnir framleiðanda niðurstöðu sína.

Berist Framleiðsluráði ekki athugasemdir við þá niðurstöðu innan 25 daga frá dagsetningu úrskurðarins, gildir hún fyrir hlutaðeigandi verðlagsár. Uni viðkomandi framleiðandi ekki þeirri niðurstöðu, hefur hann rétt til þess að skjóta ágreiningi með rökstuddri kæru til nefndar, sem skipuð er skv. 31. gr. l. nr. 46/1985. Skal nefndin fella úrskurð sinn innan 30 daga frá því erindi berst henni.

17. gr.

Brot á reglugerð þessari varða viðurlögum samkvæmt 59. gr. laga nr. 46 27. júní 1985 um framleiðslu, verðlagningu og sölu á búvörum. Með mál út af brotum skal farið að hætti opinberra mála.

18. gr.

Reglugerð þessi er sett skv. lögum nr. 46 27. júní 1985 um framleiðslu, verðlagningu og sölu á búvörum og öðlast gildi þegar í stað.

*Landbúnaðarráðuneytið, 29. október 1986.*

**Jón Helgason.**

*Jón Höskuldsson.*